

黃岡縣志

10260.87

36

9

黃岡縣志卷之十一

知黃岡縣事宛平俞昌烈



人物志

篤行

舊志括篤行之目三曰嗜學不倦曰砥節不苟曰好行其德是也蓋篤者厚也久也人非厚於殖學則游談無根之士也非厚於持躬則依阿澳涇之流也非厚於恤親念故則澆薄鄙吝之徒也而非久於其道亦強飾取名而已奚以見行之能立茲緣其例續之記所謂篤以不揜此之謂乎

黃岡縣志

卷之十一

篤行

宋

潘丙字彥明以解元舉進士與蘇軾交至善有文行其弟原秀才軾亦稱為佳士有舉業見軾與朱康臣書

董助教敦信誼恤貧乏大觀閒歲旱為食以待餓者又設養餌給小兒訖百餘日無倦色

明

董經綸多隱德家素饒好施與以義重於鄉里

孫子華輕財好施正統閒值歲大祲輸粟萬石賑黃麻蘄水三縣饑民御史臺以聞詔賜勅旌為義民

陶以諒好義輕財正統閒歲祲出粟千餘石以賑事聞旌

其廬勞以羊酒免徭役三年

朱文智字道全諸生性忠厚與弟每均財輒相讓其尚義勤施亦相類嘗歸省江右饒虔吉信連荒慨然勸賑正統成化間輸穀者再凡三千有奇事聞特勅旌之勞以羊酒免本戶差徭五年府縣官賓禮存問

曾恕字希仁黃州衛指揮僉事性至孝父全正統時征橫江戰死詔錄諸陣亡子姓恕後至人問之曰吾不忍也後督漕以介聞監司咸旌異之祀鄉賢

曹良輔字大忠居崎山陽號清溪居士置產分諸兄弟族黨無歸者濟之嘗有盜過其門曰犯長者不祥

黃岡縣志

卷之十一

篤行

二

王孚生而穎秀童時與張寶共學於白鹿洞後同舉於鄉天順癸未會試孚弟美玉與偕值貢院災美玉踰墻負孚出後入尋寶則頭面半毀又負屍出遂歸葬焉孚後爲褒城教諭應河南鄉試聘所至有方正聲乞歸建書院於西阜山莊以來學者子簡邵武推官筮夔州訓導黃伯垓字鵬遠成化丙戌進士累官苑馬寺少卿節操清亮鄉評稱重卒祀鄉賢

余鑾字廷儀正德辛未進士授行人奉使封唐王王餉以金帛不受歸與諸生論學自立崖岸有豪右觸法懷金求解鑾拒之曰國法不可撓且吾豈以多金禍鄉曲耶

其耿介多類此卒祀鄉賢

余文瑞正德庚辰進士有學行未仕卒祀鄉賢見府舊志  
又有余鏗者嘉靖戊子舉人性孝友授蘭陽教諭終養  
不仕

樊模字廷正由恩貢官兵馬司指揮性孝友好學至耄不  
倦鄉里稱爲善人

王秉直字子愚嘉靖乙酉舉人性伉直所與遊必賢豪長  
者見非其人輒引去不輕與言也

邱尚忠事後母承順惟謹子岳在諫垣有聲尚忠偶謁縣  
令令疑有所請因問近得家書否卽應聲曰兒屬家書

黃岡縣志

卷之十一

篤行

三

惟諄諄老夫慎勿造公府耳時稱其介封工科給事中  
祀鄉賢

宋章字朝憲歲貢知威遠縣親老懇乞終養士林重之

易大厦字廣居家殷實好施與嘉靖中出粟千餘石以賑  
饑詔賜義民冠帶

史秉直諸生萬歷十六年邑大荒秉直捐米六百三十石  
於團風鎮親煮粥賑饑救活多人知縣劉夢周請給匾  
額鄉人稱之

劉文元性方正故人王追美將沒託其幼子一鳴文元許  
諾乃從之學過則撻之甚則使跪於木主下稱父訓哭

而告之後一鳴成進士每接文元衣履必肅懼其怒且叱也晚爲華容教諭

王相字良弼諸生爲學必求天理爲安置義田贍族歲大饑爲粥食人於路一日見婦人渡河爲鄉人所阻乃怒以騎濟之遂造橋人呼爲王相橋郡守潘允哲爲旌善亭列名者四人皆高年敦行誼者相與鄭廷桂邱鳳鳴及其從子養儀也又程通者字子羽諸生廉而讓著有里仁會約鄉人重之

鄭廷桂字石濱性孝友好施與有貸不能償者輒焚其券年八十餘卒諸子廬於墓忽一人率妻子拜哭於墓問

之則瞿姓也曰微翁之惠則無室今子三人皆成立矣平生善行多如此長子謙舉人官雲南知府次謙次謙皆以文學稱曾孫光郢光黃見隱逸傳

杜鳴陽字子鳳嘉靖癸卯舉人性渾厚與物無忤親歿撫兩幼弟友愛備至授遂寧知縣改江川俱有惠政故人朱廷相女許聘豪右及廷相死且貧豪右背之女無所歸鳴陽乃聘爲仲子傑婦是秋傑舉於鄉時人以爲盛德之報云祀鄉賢

徐崇德字象賢貢生性坦直不私芥蒂以禮經名四方士多遊其門爲白水教諭風節特著祀鄉賢

徐禧字天祐有隱德兄早卒從子幼撫育教訓俾至成立  
平生趨人之急鄉有不能葬者助之以子銘貴贈文林  
郎

易明幾字汝戒篤於孝友諸弟早逝撫遺孤猶已出家素  
饒人有稱貸必應未嘗計其報也日每嚴重危坐見人  
過輒面折之以子倣之貴封御史

黃士元字汝覺篤志力學嘉靖己酉舉於鄉攝貴溪教諭  
主白鹿洞一時從遊者甚眾擢餘干知縣遷撫州府通  
判有能聲後歸屏居林畝日與諸士講論不輟歲祿施  
穀賑救人稱其德年躋九十鶴髮童顏望之若仙其時

有李時芳羅星俱以操行方正爲鄉評所重時芳嘉靖  
甲午舉人官興化同知星己酉舉人官阿眉州知州  
阮文蔚字自質萬歷丙戌進士性介潔嘗道經維揚饜賈  
奉千金屬居閒文蔚曰吾先世無千金產况敢侵士大  
夫權竟却之後官行人以册封上饒王道卒家貧無以  
殮巡按御史李天麟助之葬

曾日省字見獨萬歷庚子舉人辛丑會副累官潛山知縣  
行取主事致仕歸講學於赤壁正宗會館學者宗之著  
有五經心要

方一盛字新宇萬歷閒由儒士授四川鹽法提舉持法平

允商民便之擢真定知府終養乞歸事親以孝聞建祠堂置祭產又設粥食饑掩路骼修橋梁郵亭凡可利人者竭力爲之年九十餘卒

孫顯祖字衡洞諸生性渾厚家素饒周散貧乏有彭城塘澗里許歲多魚利盡捐爲宗族供祭祀貧戚有遭喪者指他人田求售於顯祖遂應之或言其詐乃曰聊爲麥舟贈耳還其田亦無德色以家事付二子棲隱山林種花竹自適年八十卒子應鴻別有傳

王同暉字調甫由歲貢授江寧知縣著廉聲擢刑部主事諸生時好施與家中落不倦嘗曰人生重義耳豈望報

乎值歲饑弟同觀捐粟千石以賑同暉亦力附之一郡多所全活

萬一儁字葆初父偉諸生晚舉儁時勢家豪奪而儁勤約務刻苦以實行率鄉人嘗避賊鄂城有豫士李姓亦以亂奉母至賊圍城縋而出反求得之與俱乃行又避家崎山路遇賊劫其帑已知爲儁也謝而還之從兄一奇嘗曰吾弟渾厚如太古他日遠大吾不及也子四俱以學行顯科名世宦不絕

曹之建字中甫父士彥有傳之建事繼母蕭以孝稱族戚交遊貧者婚葬皆助不矜已形人短縣令茅瑞徵修

黃岡志之建與焉由歲薦除吳江教諭多所成就擢廣東四會知縣有清直聲卒於官孫本榮別有傳

程士翼字冲冥諸生好施與濟族之貧乏者萬厯己丑歲歉減糶百石不償者亦不問與人寬容無所較子之試之奇俱以文行稱之試載宦蹟傳之奇官沔陽學正及歸年皆七十餘日常相依怡然樂也之敦士翼兄子少  
有文名天啓甲子舉人累遷萍鄉知縣清慎自守教人以實行

樊玉衢字荆軒少時從父煒司訓漢陽會張緒講學江漢玉衢與兄玉衝師事之益自勉於學侍父疾衣不解帶

黃岡縣志

卷之十一

篤行

七

者三年比卒毀痛骨立兄玉衝清介早卒無子玉衢治其喪葬嫂余苦節事之如母又置義田贍族立義倉以備凶荒見善事輒行不遺餘力流寇之亂所在摧靡玉衢指授方畧守土者賴之當事薦其才辭不受年七十餘卒祀鄉賢子維鼎維域維忠俱有聲維域別有傳

何值字報所幼聘同郡鄧氏女女年十三目眇足廢鄧翁謝請他聘直不可竟娶之後鄧卒遂不再娶父母卒月省墓歸則扁一室以詩文終老子閣中別有傳

鄧士駿字良夫諸生性孝友好學深思卓然自立與弟士駒皆有才名與黃梅瞿九思爲文字交年六十卒子雲



程載忠義傳

葉國章字憲可諸生向陽子事繼母以孝聞少勤學博涉經史年三十舉於鄉授廣東徐聞知縣以疾歸平生好行德義全活甚衆有鄉人來全者以已女償人償章爲贖歸之又嘗借蘇州陳立吾及楊應第百餘金值兵亂後無可歸者乃以其金分濟饑人書其上曰某氏之金使歸功於陳楊也子大年之允俱諸生

何譔字韋長弟謙字緘仲兄弟皆博學尙氣誼人有一善力爲表揚與廣濟劉養微交最善養微病譔謙家距三百里器用服食奔走應需者絡繹不絕歲餘養微沒經紀其喪爲刻康谷子集其他豁達好善類此譔子元方篤行能文以諸生終劉醇驥爲序其遺集

屠應蛟字仁齋至性過人潛跡授徒多隱德壽百歲子振鐸官工部主事請諸朝賜冠帶建坊妻周亦九十有七黃鉉字宏卿好宋儒書諸弟少孤皆教誨有成以會副授湘潭教諭遷河南永城知縣多善政擢兵部主事告歸仲子中實別有傳

劉伯江宏治時大饑邑及麻城黃陂三縣尤甚伯江捐穀萬石銀千兩全活甚衆

汪之渙字鳳溪隆慶庚午舉人嗜學尙義萬厯戊子大饑

之渙捐穀拯濟全活甚衆穀盡自食菜羹無悔甲戌公  
車道見少婦自鬻贖夫罪與之金遂去旣而其夫送婦  
以券至之渙焚券令歸人義之卒祀鄉賢孫煉南有傳  
謝宗湯字建中博通文學明末歲荒路拾遺金坐待還其  
主不問姓字人稱篤厚君子

杜鈺字子堅幼爲諸生有雋才習父時芳訓言動不苟素  
好義有夏姓者垂老爲豪右迫鬻其子鈺爲贖之後與  
弟鏞同舟弟溺鈺赴救之並沒於江詩文甚有稱同里  
杜詔先爲序其遺集

邱一貫諸生敦善不怠家素饒遇困必有濟時疫施藥活  
者無算嘗一日焚券千餘金人有質絮袍及被者冬不  
贖輒取以還子維明維時同榜舉人

國朝

陳天生字植其父鳳正生母劉俱早逝事嫡母蕭至孝弱  
冠補諸生敦行尙義以清白訓子孫敝衣芒屨道遙遊  
咏有古君子風卒祀鄉賢子五長肇昌別有傳

鄧錦字子燦本姓曹順治丙戌舉人累官兵部職方主事  
出判彰德府解組後沉酣圖史被服若儒素端方誠篤  
里中稱爲長者

杜琦字奇玉太僕仲之孫也警敏力學事母以孝聞順治

甲午舉於鄉授黔陽教諭日集諸生講禮法程文藝士  
風一振庚子應聘滇闈稱得士子士默字伯緘倜儻好  
義由選貢教諭大治士人悅服值歲饑民譁士默諭之  
輒斂息故人索震老無子及知縣汪灝子壻貧不得歸  
士默俱養之終其身無德色

鄭正暹父母病嘗藥泔垢後任海城典史有金州豪王守  
祿通島船爲姦府屬正暹治之祿密賂以千金却不受  
獄益急祿遂陰賂塾師觴正暹酖之府廉得狀治酖者  
罪子維憲康熙己酉舉人襄陽教諭

蔡師孔諸生性好義居濱孫鑽埠大河水漲人艱渡師孔

捐造義船並置田數十畝爲修理攜掌貲又置祠族祭  
學並所建白雲寺香火各田數十畝爲永久計子之騏  
諸生亦勤施有旗丁逋官糧之騏捐穀三百石銀二百  
餘兩貲其死者七人閭郡義之鄉飲聘爲大賓

陳偉字壘臣諸生父尙友潼關縣丞偉刻志讀書敦行勵  
品性至孝值明季賊亂奉母避難雖倉遽未嘗稍懈康  
熙二十七年夏逆將趨黃郡守以偉有幹濟使團練以  
守及夏逆敗金口走白雲山偉與易爲秦計縛之一時  
煙戶賴以保全子瓚廩生多隱德士俊癸巳舉人孫應  
龍乾隆戊辰進士榮與諸生俱有文學

聶文錦字道章諸生篤志嗜學尤慷慨好義有梅邑故家子爲無賴所賺文錦詰得其由設計贖之併令就塾撫之一如已子趨三年有成乃尋其家送歸其家謝以厚餽堅不受生平行義多類此

韋克繼字承公歲貢生性和厚樂爲善事從弟妹之孤皆爲婚嫁又故人辟仇遠遜遺子方數歲克繼育之三十餘年學成有室其父始見焉克繼招之歸也年七十餘卒

熊翼爲字湘尹諸生事親先意承志病侍罔懈與人諒直爲戶正整齊有規矩置祠產養老恤孤倣范文正法好黃岡縣志

施與於物無所取嘗見遺金守而還之砥行好學鄉里遵爲模範子德焱諸生崇禮收族不墜父志

易中瑜字與偕諸生家素貧力學尙義族有幼貧而爲僧者贖之歸撫養授室子姓遂盛其妻弟出繼他姓亦收養之嘗拾遺金候之歸其主所著有大學中庸講義四卷纂輯各代史評三十卷子德瑩字以文弱冠入郡庠事親以孝聞厚重好讀書不忝其家學

龔鼎鏗字夏葵十歲能屬文以明經謁選訓導未赴任卒性孝友研究宋儒之旨尤精春秋左傳爲人謙讓厚德里黨號爲正氣先生其弟錫恩字漢若諸生輕財好義

族中貧者悉周之晚年工詩文著有鷺湖別錄從子陳謨推財讓產善處兄弟亦以義稱

胡可封諸生篤學尚義康熙十八年歲饑捐穀五百石又勸捐穀千餘石計口給糧活人甚衆郡守王輔親至其宅匾旌之

陳維藩字爾碩家素封好施與康熙十年歲饑維藩捐穀四千石以賑次年再饑復爲粥於路存活甚衆布政使徐惺郡守于成龍給匾美之年九十八卒

周之鳳字爾尊重義好施與康熙十四年歲饑捐穀千餘石以賑郡守于成龍給匾旌之子維禮德安訓導維祿

維福諸生孫棟隆乾隆壬申進士應隆諸生

許文燦性仁厚輕財重義康熙九年歲饑文燦捐米設厰煮粥以賑全活甚衆同知于成龍給匾旌之

徐肇泰性孝友好施與康熙十八年饑肇泰設粥於路兩月貧不能殮者施棺二百四十餘鄉人稱其事

張美之市民也尚節義少時遭流賊亂身被數創走伏荻林中見女子言自江陵避亂迷路不得歸美之使就其家養之禮度維謹歲餘亂平訪於江陵果得其父壻迎而歸一時傳爲盛事後美之壽至九十餘

杜大任字連玉歲貢生雲夢訓導性純厚篤孝友鄉黨推

重太守李彥瑁慕其賢敦請鄉飲賓教學於城南草堂  
貧者助其薪粟多所成就子啓運由進士知西和縣性  
廉才捷屢決疑獄力清陋規督撫薦其才未幾卒於官  
士民泣送百里外爲勝遠致於黃云

靖乃質字素菴諸生素抱經濟爲善於鄉康熙甲寅乙卯  
間連歲旱荒乃質捐穀爲鄉里倡全活甚衆太守于成  
龍獎異之又嘗捐千金爲宗族建祠修譜年幾七十訪  
詢所至不憚勞瘁鄉族稱焉

孫昌蓮字天被學行修飭爲士林望歲大饑力募捐賑全  
活者衆以選貢授教諭未仕卒

周有堂字叔蔭少孤事諸兄敬愛備至家貧力學屢試輒  
冠軍康熙壬辰進士授中書舍人丙午典試浙江稱得  
人補禮部主事疾歸仕宦二十餘載仍家徒四壁云  
蕭必昌字克侯諸生端潔自好年三十妻亡遂不再娶接  
人必飭衣冠言動維謹至老不倦好學博聞尤邃於易  
年八十餘卒

周世達字道以國學生父之美立從弟聰子爲己嗣也世  
達慷慨讀書能文章好賢以禮見鄉里窮乏輒贈之往  
往折券棄負家以是落不恤也之美官四川生子曰世  
適之美卒世適幼疑世達其母聶乃詳言世達之爲人

且曰是至誠不可疑者於是終身無間言子八人多能文茂建乾隆丙辰舉人

方可丹字一常雍正癸卯進士授新淦知縣有廉平稱以病改辰州教授訓士先行後文丁艱歸閉戶不出前守禹殿鰲延主河東書院多士景從時以方正舉後選襄陽教授卒

孫天祿字亦煒父士謀諸生事親委曲承順鉅細必誠天祿事祖母亦以孝稱嗜讀書敦行誼雍正五年歲饑粟踊天祿糶千餘石減價十之五多所全活邑有貧鬻其女者訪知爲故家後乃擇從子年相若者婚之人以爲

義晚以歲薦訓當陽能得士心以疾乞歸子廷璋副榜廷槐舉人廷瑄諸生

魏永絲字言如由鄉貢教習授儀揚鹽運分司性孝友好施與雍正五年饑設粥米多所全活又嘗建義倉義塚鄉人稱之著有怡怡堂稿弟永經亦以孝友稱

萬紳祖字純子爲恪第三子性篤孝友父病求醫一口夜行二百餘里及卒殯殮皆誠慎如禮歲時館穀歸一付諸兄弟無所私爲人樂易坦直終身無疾言遽色好施與宗黨急者歸之不以疏數閒嘗急父友之難崎嶇齊豫頰泗間雖值危迫不忍去事已經年乃歸又嘗值歲

暮以私逋且亟貸金將償焉遂有被誣者告以困遂傾囊予之終不以無償悔

邱自東字震芳性好施與雍正五年饑穀價踊甚自東減價以糶踰年又饑六月連雨鄰里斷炊升米三十錢自東乃焙新穀乾之升僅三文存活甚衆人咸義之

曹紹烈字承緒雍正癸卯武進士當道屢促就職以親老辭不赴性幹而廉邑有公務非其人莫任乾隆乙丑郡守禹重修韓魏公書院烈贊成之丁丑邑宰劉改建縣學宮專屬之年餘告成一材一木悉無虛置戊寅郡守錢增修考棚及創河東書院烈爲經始及郡守王視事

黃州諸爲商訂而烈年六十有二老且病病且革矣可慨也夫

陳師豫字書田副使大輦子雍正癸卯舉人性純篤事祖母徐母鄭以孝聞嗜學敦行誼生平施與甚多歲稍歉則減糶饑減十之五全活甚衆見族里能學者勸之必濟以薪米及應試賞其他賻棺槨助嫁娶事難枚舉例選主事未仕卒

唐方泰本姓呂家貧力耕行壩城山道上見遺金不取坐候之逾時一客踉蹌至則徽商李文候所失五十金也文候感其還金欲有贈不受一時稱之



顧筠字竹如父文玉諸生筠幼時父爲聘室未嫁而瞽其  
父母沒兄嫂惡之遂使蓬跣事舂臼文玉見之歸坐而  
嘆筠問告以故筠曰幼聘之瞽而棄之非義也父喜曰  
爾能如是遂迎而歸夫婦終身無忤色

陶之瑤字荆璞貢生性孝友好施與雍正二年邑饑捐糶  
千石價減十之二至五年做社倉法放穀千餘石所濟  
甚衆又建韓家社橋捐貲三百餘金行人便之子成新  
孫國幹別有傳

謝惠敦行好義親鄰借貸輒應折其券佃農逋租往往棄  
之嘗捐社穀百餘石重建賀漣橋鄉里稱爲善人

秦樂天字少白嘗讀易閉戶二十年值歲疫樂天承父志  
捐貲置棺助其里晚年吟咏自適著有山居稿及擬陶  
擬樂府諸集

余文元性樸誠喜施與雍正癸卯捐洪山寺社倉穀百石  
又捐修棠棣湖橋復置田爲修理費行人便之

程後濂字貢書乾隆丙辰進士性孝友母患瘵朝夕服侍  
衣不解帶者三年大父芳烈遘宿疾牀簣汗垢躬自滌  
除閱兩載無倦色家僅薄產舉以讓弟時人稱之生平  
篤志力學嘗以鴻博見舉未就河東總督白鍾山奇其  
才辟署海贛同知著有治河未議尋以父病乞歸父沒

哀毀成疾逾年卒

朱案扶字典傳好古勤學雍正癸卯舉於鄉教諭南漳振興文治襄陽書院延爲山長一時經指授者皆有法度與修安陸襄陽鄖陽府志以艱歸哀毀踰常三年啜粥不茹葷性廉慎不妄干謁樂施勸善纂輯孝經衍義及五經註疏至老不懈乾隆戊辰成進士

有若敦行礪節積學授徒鄉黨重其人不能搜其遺事猶冀後之考而續之得十六人貢生李拱祝王名啓田宏道諸生李逢年歐鶴舒日觀洪必璋李璜童顯德李春宜夏聲王林笏陳師鼎孫可行周步穉杜贊

黃岡縣志

卷之十一

篤行

十七

王宗華字景虞父如海以廉賈饒於財而好行其德鄉里稱善人嘉慶中大憲上

聞許以樂善好施建坊者也宗華克家承志倩弟啓麟登第宗茗等同力治生怡怡無間待三黨悉有恩紀修舟橋施棺槨美行不可殫述述其大者孔子河舊有

先聖祠本邑及旁縣人歲舉祀課士宗華爲置田百餘畝以附益之京師舊有黃岡會館以待計偕人衆不能容爲擴基址而葺新之於城中創賓賢館捐田七百餘畝爲邑士鄉舉資並蘄水之興賢莊亦割腴田百畝爲飲惠其所自出也黃試院湫隘號坐傾敝士積苦之宗華

廣鬻民房改修壯麗宇高翔足避風日案堅固不可動  
搖一切什物器具皆充盈而耐久又推之於武昌試院  
亦然又推之於鄉科貢院增修號舍八百區以備廣收  
前後費金錢不下十萬嘗曰財無聚而不散之理余先  
人非沽譽圖遠怨也非惡富恐速子孫貧也某敢不廣  
其意丁卯年楚臺上其義行議叙鹽課司提舉弟啓麟  
宗茗議叙州判子謙亨候選教諭士棻士埤皆醇謹能  
紹其先

義僕

華魁叟邱高奎僕也明末兵亂高奎年甫十二為賊所  
擄魁叟奮身入險七年得之邱氏數世子傳至是得不

絕既歸延師訓之補諸生為明經後高奎卒有幼子四  
魁叟復百計輔之成立前後事主五代壽一百一歲  
胡義吳文蔚之僕也文蔚父母早沒義夫婦養之崇禎癸  
未獻賊肆虐見嬰兒必貫槩上為戲文蔚時六歲為賊  
所得將槩之義夫婦躡踊哀號吾主人遺孤止此義不  
忍絕爭以身代賊感而釋之

隱逸

鴻飛冥冥弋者何篡義在易漸之上九矣顧或謂風雨如晦雞鳴不已君子貴愛其身以存道固宜若夫陽德方亨眾賢羽翔鱗躍而獨憔悴江湖之澳枯槁山林之隈何太自苦歟語曰堯舜在上下有巢由亦各行其志也而表厲一代風節識者且謂其功在雲臺麟閣之上豈不信然吁持此意以觀是邑之陸沈者當無徒曰光黃間多異人

周

江上丈人者楚人也楚平王以費無極之讒殺伍奢奢子

黃岡縣志

卷之十一

隱逸

十九

員亡將奔吳至江上欲渡無舟而楚人購員甚急自恐不脫見丈人得渡因解所佩劍以與丈人曰此千金之劍也願獻之丈人不受曰楚國之法得伍員者爵執珪金千鎰吾尚不取何用劍為不受而別莫知其誰員至吳為相求丈人不能每食輒祭之曰名可得聞而不可得見者其唯江上丈人乎

按江上丈人舊志不載武昌縣志謂蘆洲漁父寓高義於短歌列國志亦謂伍員所渡之蘆中即蘆洲在武昌縣西今查蘆洲實黃岡地故補列於隱逸之首

宋

王文甫博學篤行隱居不仕東坡來黃嘗因其弟子辯過從往來凡四歲及移臨汝有留別王文甫記

元

范愷字士元博學能文性恬約不肯仕進年九十餘終

吳應澍性淳實重義好施歲饑設食於路貧不能殮者助

之棺置橋四十餘處井十九居民便焉湖廣平章事以

聞詔徵不起賜書西山二字人稱西山先生祀鄉賢子

琳明初官吏部尙書有傳

董敬中字仁輔一字建中成宗大德八年爲參知政事明

初隱居團湖因以自號劉基屢爲薦辟躬往聘之竟不

起有鏡心樓見古蹟

明

黃岡縣志

卷之十一

隱逸

三

吳榮一洪武初棲中和石壁山博覽豪吟種蔬養鶴抗志

不仕嘗荷鑿劔藥以濟疾苦後有王瓚及思裕者俱以

隱德聞

畢奇中好讀書家貧歲授生徒講課不輟儻然自遠聞達

漠如也

樊志張原名維甫字山圖玉衡次子隨父戍雷陽二十四

年及玉衡歸卒志張慟幾殞遂不應試潛心易學著易

象易數易適易占益王遣使再聘皆不就

陳鴻恩字大壑萬厯丁酉舉人累官貴陽知府所至有政

聲後退居林泉手一編不輟以老

洪周祿字半石天啟壬戌進士知常州府解綬歸里肆志詩文行草書妙絕一時急難好施鄉里德之卒七十餘卒曾孫宗鏊諸生甘貧力學善書法

陳師泰字交甫性端方崇禎庚午舉人累官蘇州知府告歸隱居樂道好吟咏工書法家貧問字者餉以酒卽留客談論竟日年八十餘卒

韋克濟字孝忍崇禎丁丑進士授南安知縣以誠格巨猾邑人賴之丁艱歸遂隱武昌之賢庾鄉率諸子躬耕自給究心典籍與從弟克振爲詩文以自娛

袁希燮字子理文伯子年十五和李本寧黃鶯白鷺詩各

十五章本寧大器之已而與三袁唱和又與喻羨長錢仲舉輩贈答於金陵遊跡幾半天下歸隱於茅山之麓結茅曰遯園以著作娛老子璜琮副榜詩文敏捷有稱王一才字遠屆弱冠補諸生以文名爲詩皆泉石之音人或勸以用世輒唯唯然性不可強也寄興花竹魚鶴時坐桐陰下擊節高歌而已著有後絕交論時人傳之易爲鼎字用王有文在手曰汪因號汪來子蚤以文章氣節著明季壬午學使高世泰修三楚文獻錄鼎與汪三奇龍墳劉醇驥皆與焉築室白雲山教授生徒著有經說四書尚書毛詩易說及雪香亭草龍墳字夢先邑貢

生官應城訓導江西文德翼雅似堂集云墳以文名海  
內者三十年益高士也其後無考

李之泌字鄴仙父雲築諸生以詩文名之泌窮性理發程  
朱之旨明末隱白雲山劍峯下歲薦及徵聘皆不就爲  
人嚴氣正性非其友不交一言居常閉目袖手而坐有  
財則與故舊貧乏者卒前二日猶與同學論顏子四勿  
中庸西銘天人之意著有夙知錄松鱗集悅泉詩集子  
孝迪孝种皆淳篤力學种善詩及書法

杜濬號茶村原名詔先崇禎己卯副車父祝進舉人官國  
子助教精藻鑑有隱德濬負異才以詩文名家壬午不

售遂絕意仕進遊覽名山水才聲雄概驚豔江淮士大  
夫以不識其面爲恥乃益隱避甘心窮餓以守道義老  
於江南之雞鳴山右曰寓齋年七十七卒葬其地子世  
捷世農遂家焉皆能以詩文繼其業

杜芥字蒼畧同兄濬居江南以吟咏自適雖饘粥不繼廓  
然不介胸臆著有些山集卒年與其兄同桐城方苞爲  
之各銘其墓並見藝文志

王一翥字子雲太僕追臯子有異才以忠孝自矢貧窶好  
讀書一時名士無不知有王子雲者少以父應當得官  
不就魏璫聞其至都下將招爲記室卽日棄僕從逃去

庚午舉於鄉明年獻賊破三江口其妻樊氏死之詳烈  
女傳一翥奔白雲山尋隱於匡廬之吳鄣嶺著書十餘  
年一夕爲賊竊去乃歸寓於巴口卒葬其地曰鳳山詩  
文旣散失其前曰智林村稿餘則爲長迹園青蓮花樓  
尋子等集制義曰留響編子封帶封洽當闖賊之變從  
父居廬山封帶以憂憤卒封洽後歸於黃

鄭光郢字爾忠弟光黃字爾孝前雲南知府鄭謙孫也少  
孤母甄守節教之皆孝友勵名節同補諸生及長隱居  
相與著述積卷甚多燬於兵然至老猶力學不少挫光  
郢子宏博字古遺亦名諸生隱居自守時稱長者

官撫辰字凝之太常卿應震長子也少穎異博學工詩古  
文精天文兵法以選貢授桃源知縣上治河需兵議當  
事不能用丁母喪歸總督徐標舉爲眞保監軍又擢徐  
州知府皆不起及閩粵諸藩聘之撫辰慨然曰天道不  
可違也臣節不可變也遂祝髮於維揚名德昱又號知  
劍道人雲遊名山古刹老歸黃居維摩堂卒葬其處  
萬爾昌字師二少能文好賢尙節義崇禎丙子舉於鄉流  
寇亂母陶遇執爾昌號護求代賊感其孝釋之徙武昌  
見楚藩亟言防城不如防江爲陳策不聽遂歸黃自是  
杜門絕口不言功業見樵夫漁子輒坐對終日無倦容



嘗與兄里春築堤障湖禦賊湖環陂岡江夏三邑冬夏  
巨浸人東西避寇於是十餘年無患又做社倉春出秋  
入行之五年人稱便會大饑乃悉付郡守王輔以賑一  
方全活甚衆所著有頤莊詩文集頤莊隨鈔年八十有  
四卒子爲恪爲懌別有傳

萬爾昇字退修少豪華爲諸生有聲年三十棄舉子業結  
茆居劍置一榻負牆坐當肩牆凹至尺探其袂虱盈握  
也四十餘年未嘗至門內與家人接平生所著有史求  
及秋水岑詩滋言集年七十有四卒弟爾景字舒季篤  
學尚節義以諸生隱子燦別有傳

曹大濩字尙白諸生父之棟有傳大濩生而偉異莊言厲  
節不六仕進年八十餘清癯鶴髮士林重之工書法所  
臨摹古帖甚富有谿隱詩文集于本復字剛來詩與書  
法亦有稱

魏澤霖字鶴山家貧嗜學讀書於湖山之一葦菴厭舉子  
業怡情山水少交遊人多不識者著有紅雪齋詩集從  
孫希聖亦能詩

杜士鶚字騫公諸生博極羣書研究經術寄跡於漸水之  
昔山授生徒三十餘年每因事導人於善年七十餘卒  
無嗣其門人陳汝鱗王宏毅諸人葬之建祠於昔山下

置田以祀

王士龍字水簾工詩古文名籍甚以歲薦授潛江訓導及歸刈蓑結廬遠近多請業者所著有蓑廬集年八十餘卒同邑陳大章稱其逸才高節古之文獻爲序其集孫南朋舉人官知縣

萬年鼎字常銘諸生嗣母張苦節教之以孝聞閉戶力學不求仕進與李之泌鄭先慶易爲泰鄭宏博爲執友築室東絃路口村修講禮法動引古先一時仰爲模範年七十卒子初陽字寧周諸生

奚鼎鉉字仲雪崇禎己卯舉人以文行自勵參政許文岐

黃岡縣志

卷之十一

隱逸

三五

七

守蘄州引與俱獻賊陷蘄文岐被執鼎鉉與同事數十人俱幽繫文岐密謂鼎鉉等曰賊老營多烏合餘皆被掠良民若告以大義同心協力賊可殲也於是陰結四月起事以柳圈爲信謀洩文岐見殺鼎鉉以計遯事見明史自此絕志仕進名節詩文爲一時推重

樊維師字尙父少負逸才詩文下筆立就宏光時由附貢任淮安司李一時名士多與游後歸田結廬寒溪側吟咏以老著有四書文集及雪菴勁草

汪國潑字漪公明諸生才敏瞻以詩名晚隱並阜山麓號阜山樵人魏公韓稱爲雲霄之上有其人麋鹿之羣亦

有其人著有樵阜詩集及諸遊稿

嚴子靜字淑修廩生博涉經史窮探理蘊崇禎癸未間獻賊陷省城歸聚鄉勇畫策防禦里得無恙後隱居武湖濱號學晦居士鄉人罕覩其面其婦翁萬一奇任開封推官數召之不赴年八十餘卒子八半諸生孫世同癸卯舉於鄉世勲贈奉政大夫

國朝

胡來通字安吾明嘉靖時人年十二僧見之曰此人間百歲翁也性好施與楚撫魏光緒表其廬順治庚子壽百歲僉謀建坊來通力辭之忽一日沐浴更衣端坐卒孫

黃岡縣志

卷之十一

隱逸

二六

八

琪珠能繼其志琪字石屋諸生好學汲古以詩名金聲譚元春雅重之爲序其集後散佚珠別有傳

楊鍾乾字健之父企虞家訓有法鍾乾性穎嗜學淹貫經史隱於邾城龍邱閒論學不倦子允禎進士

周綃字元初性穎異博涉經籍自遯跡山林無人知其學者鄉里惟見綃輕財好施推爲長者子之美進士浦城知縣以經濟稱

余師臯字迪甫諸生積學邃養多所著述明末流賊亂手錄無一存者乃隱居龍崗山中子世羽康熙癸卯舉人瑞安知縣有清白聲

錢材梅字會川簡默端嚴讀書城山龍泉寺歷數十年罕  
與外接通易理兼工顏柳書法著有左傳提綱名文彙  
選孫兆清生員世其學

方伎

若蒞壺涿古具其官白澤青烏世傳其說自夫弔詭之士依託怪神巧發奇中以眩愚蒙徼寵利君子斯疾之已若乃醫卜濟於民生書繪比於文事固道術之支流餘裔也擅是能者各出天機各承師授致遠雖泥適用則精豈可以與誕漫之徒同類而並論之哉

元

葉如菴儒醫診視有方撰傷寒大易覽一編爲時所宗

明

宋鯨幼業儒未就遂精岐黃術診驗生死如神不責貴謝

黃岡縣志

卷之十一

方伎

三

里人管大用病死將殯鯨過其門試治之復蘇類此全活者甚衆

陶仲文嘗授符水訣於羅田萬玉山嘉靖中由黃梅縣吏爲遼東庫大使秩滿需次京師素與邵元節善寓其宅時元節得幸年老宮中黑眚見治不效因薦仲文以符水禦劍絕妖十八年南巡元節病以仲交代有旋風繞駕仲文言主火是夕果火於是授神霄保國宣教高士尋進封神霄保國宏烈宣教振法通正忠孝秉一真人明年以祈禱却疾功授少保禮部尙書尋加少傅仍兼少保帝時見輒賜坐稱之爲師而不名大同獲謨者王

三歸功上元加少師仍兼少傅少保一人兼領三孤終  
明世惟仲文而已二十九年春災異頻見仲文言有冤  
獄得用方解時都御史胡纘宗下獄株連數十人悉從  
輕典果得雨乃以平獄功封恭誠伯歲祿千二百石仲  
文得寵二十年位極人臣然小心慎密不敢恣肆郡中  
橋梁多所刼建行人利之卒年八十餘賜葬祭加諡榮  
康惠肅詳見明史

胡大順嘉靖中寓京師以巫術召子姑神見幸勅賜方外  
散人詩文奇詭一時傳誦見明史

馬蕃字松雲善繪事有夏珪馬遠劉松年筆意黃邑知繪

事自蕃始然莫能重之貧困以歿

李藻字文甫能詩有氣節畫筆清遠得李營邱家法不治  
生產每得數百金立盡年七十餘尚好遊卒於河南息  
縣葬其地常自題畫云一幅嘲川無着處夜深猶自月  
中看人多傳之著有橫鶴老人詩

宋子京學舉子業不售去而爲醫望人輒知其病有巡道  
不能食或以子京進子京曰且無往當先觀之於是伺  
其出從輿上觀之乃做衣冠垢汗而進巡道怒次日病  
愈詰其故曰公平生常得喜病一怒而喜消便能食矣  
又見昇棺者血出口此可生也問之則婦以難媿死針

之婉一男母子俱全視郡守脈謂十年後當頤西南節  
鉞然必墜下頰至期撫蜀果病子京至將下拜以手掖  
之起而下頰已上矣

甘霖字時望少嗜河洛奇門禽星之學歷滇粵窮塞上屢  
遇奇人授以太乙六壬皇極範圍周易大定諸數後謁  
武當宿紫霄宮又得終南無礙師元養接命之秘形家  
之術嘗聘贊幕府平播曾平島夷屢犯虎口卒獲全雲  
間陳繼儒謂霖忠孝填胸精神滿腹功成不受爵長揖  
歸田廬關中張儀仲刻其所著五種秘竅全書謂根柢  
儒理非楊會廖賴所能顏頤云

方伎

黃岡縣志

卷之十一

三十

國朝

朱心安明未避亂揚州求卜遇異人曰子以吾術終可得  
中富然常病一足心安師之五年盡得其秘歸以善卜  
名占驗奇中其終身一如異人言

胡延大字德孚性孝有文名其父教之醫活人無算隨遇  
施濟不責貲謝人稱長者年九十二卒子有謙應周俱  
列庠序

袁黃琮字三山有文學尤精於畫常畫觀音像安國寺僧  
戒顯視之曰筆已通神可留寺中供養然不久存人世  
也未幾禪堂火象見畫像衝煙去其徒汪家正亦能詩

畫得黃琮之秘邑中以畫名者又有余昇王以璋李中柱昇字羲馭以璋字形佩中柱字天擎

陳繼謨字五葵學問博洽屢試不遇遂業醫治病多奇效名聞於京師由太醫院薦舉授八品吏目六年以親老告歸性孝友行橐甚豐歸卽盡散諸兄弟生平著述甚多值所居濱河水漲壞其居僅存陳氏醫案一書業岐黃者皆奉爲準繩焉

索震字獻子工隸書善寫墨竹風致瀟灑鐫石法文三橋其外孫徐元士字素臣傳其法亦稱能品又有王如琮字寶臣邑諸生有詩名詳考六書篆刻蒼秀

黃岡縣志

卷之十一

方伎

三

易時澤字汝悅父爲泰有傳時澤邑諸生同從弟時範學醫於隱士李之泌皆精其術時稱二易初之泌受醫法於江南劉霖生著庸臯醫學寶露又授方洛呂君調洛字東卜君調字戒平著醫方人華集其子大呂著傷寒心要識者以爲正宗後二易旣老黃念貽何子康歐斯萬許永生以良醫名皆之泌門人也故黃岡醫學獨稱師授過於他邑

胥秉哲字匡生性穎異博通書史家世業醫嘗遊吳會燕豫間遇沉疴投劑卽痊著有診法精微等書後徙居江夏



方可發字適成貢生能詩善繪事以畫梅著名得楊補之梅沙彌不傳之秘曾寫老梅一株勒石於赤壁坡仙亭與東坡老梅並美惜墨本世不多見寸縑尺幅人爭購之所著有梅譜琴譜藏於家

易洪周原名德溥博涉羣書精岐黃術雍正七年

召對授禮部額外主事年七十一卒於官

謝仁淑字玉亭惠孫如錦子生性脆犖初攻舉子業試不利改業醫熟精本草綱目句櫛字梳其術實能生死肉骨數百里外有相延者弟仁溢工篆刻兼善丹青有盈川畫譜淑著有醫案紀畧子從本方朱分授內外科皆

黃岡縣志

卷之十一

方伎

三

爲名醫

曹昌曉字耀勳本榮嫡孫家多藏書曉性好涉獵務博覽不樂仕進喜作擘窠大字真書章草均學董文敏至今鄉人有藏之者

邵光祖字可樓拔貢生學純養粹尤工書法神氣流貫骨肉停勻駸駸乎入二王之室矣所遺真蹟悉箴規名言有識者多珍之

謝殷字懷仁前志節孝壽母謝袁氏子也年十六補弟子員明末薦饑傾家賑貸避土寇亂由庶安鄉遷城中母病禱龍王山而愈曰是非可恃爲人子當知醫因殫心

靈樞素問及諸家書奇方異驗所活無算府縣官皆加禮敬邑嘗大疫人患頭腫足脆殷出二千金市藥爲丸救之後名益盛有所獲悉以施藥物散盡諸生澄廩生醇其曾孫也

汪士璠一名士瑤諸生工書畫兼善飲畫授自沈縣尉母憚壽平女然罕存者書參趙董而骨格超逸惜以麩槩自促人多比之劉伶云

賀澤璜字美玉以母老疾棄儒業伏誦內經素問等書遂精醫理蘄邑熊姓患病醫皆謝不治夢老叟言得白石礮當愈有知賀者令其訪延果得痊白石礮蓋賀之里

黃岡縣志

卷之十一

方伎

三三

名也

童瑾字建三學米元章書嗣遇異人授以醫方脈訣習十年乃敢視病嘗有人伏中患寒疾服三緇袍不汗瑾診其脈曰且褫其一少頃又褫須臾且盡問寒否病者曰不寒矣一藥而愈

嚴文鼇幼穎悟師事胡大廷精岐黃術其從兄患血蠱飲啜如故鼇曰危甚三日不起後果然又鄉人患傷寒死半日矣鼇曰服藥卽愈治之亦驗卒年七十三子承冠亦善醫

高序奎庶安鄉人精數學善風角星象而以占易爲業不

多受錢如君平居常手周易一卷眉評縫註皆編書凡數十更嘗於居室門側作小渠僅容斗水人問之曰偶作劇耳數日鄰舍火而奎居如故又嘗突入鄉家促臥人起梁傾直碎其牀居恆室內几席多參差置之作奇門式賊不得入晚年忽遁去不知所終

姚希伯通文藝晚得叔父吉玉枕秘葬經所設多奇驗年七十卒子本沔傳父書

劉之鑾號雲亭乾隆甲寅舉人性嗜學善屬文尤工書畫書摹唐碑風姿俊逸晚乃變而爲蒼勁畫以山水專門

黃岡縣志

卷之十一

方伎

三十四

程之驊字仲超性沉靜精於醫術立方多奇驗養生得運氣法調息月餘能於暗室中視物如晝卒之日沐浴端坐若有前知子啟厚孫豐邱皆以醫世其業啟厚著有醫方秘纂時又有樊明睿吳世達亦以醫名於時

張利川號星槎國子生少秉異資邑令葉世度奇之贈以勵志詩嗣園場屋遂棄舉子業留心圖史旁及雜流善草書得米南宮筆意尤精卜筮占驗多奇中晚愛遊覽常客吳下求書者空集年九十餘歸老於家

涂必魁邑武生常從軍有功不受賞以疾歸習形家言於郡城風水尤亟亟焉如培龍改水修塔濬濠諸議魁倡

之也惜功未竟而沒

涂治岷字已山邑諸生工書法自成一家同時有李濤者自號青虬道人善丹青有馬夏遺意一時涂書李畫皆豔稱之

李拂雲字樹階諸生性沉毅力學攻苦說經愛孔鄭而不過詆程朱讀易專主王弼數學兼習天文書讀書晚則登高觀象恒至達旦以故言事多中嘉慶十八年彗星見人言紛紛雲獨愀然曰事或不驗若驗其在京畿乎然無多患也未幾而有林清之變旋即撲滅如其言

汪垂裕幼攻制舉業喜爲高簡之文屢試有司不利遂絕

黃岡縣志

卷之十一

方伎

三

意進取博覽羣籍於醫卜星象堪輿之書無不畢覽而尤精於天文凡七政四餘之躔次四海九州之分野皆能厯數如指上螺紋晴雨水旱問之輒驗喜作詩有晚唐風韻而不自珍惜多隨手散失

馬天寵字師中諸生性直而喬野不諧於俗工書法初學顏魯公筆筆用力楹聯方幅多不擇紙然耽麴糶乞書者必研墨與酒並置几案間

陶宜炳字星浦監生性豪邁失怙恃後不樂進取熟於史鑑兼以臨池爲樂小楷摹晉人愛學懷素草書結字多有風趣子致孝舉人官知縣


龔斗南字小梁優貢生工詩善書法初學趙文敏後專摹  
王夢樓太守書有美女簪花仙人嘯樹之致由宣城訓  
導遷雲南府經歷賀耦庚李式吾制軍陸立夫中丞皆  
擊賞之同時有王祚賓者邑廩生亦以善書名專得趙  
文敏之神韻雖豐碑大碣非二人所長而疾雨橫風已  
脫俗書習氣矣

黃岡縣志

卷之十一

方伎

三六



流寓

浮屠不三宿桑下恐生恩愛焉彼絕物物亦絕之若乃君子所過草木皆有嘉聲所居山川亦增景色其但如雪泥之鴻爪已乎邑寓若韓魏公蘇端明嘖嘖在人齒頰美矣其他可述而志者是亦人往風存令人弗能諉也已

宋

韓琦字稚圭相州安陽人兄瑒天聖間守黃州琦從之讀書安國寺白晝青燈風雨無怠後登進士仁宗時入相封魏國公諡忠獻黃人想其德望爲立祠寺旁

黃岡縣志

卷之十一

流寓

三

蘇軾字子瞻眉山入嘉祐二年進士元豐二年知湖州言事者撫其謝表及諸詩語爲訕謗謫黃州團練副使本州安置寓居定惠院遷臨皋亭故人馬正卿爲請於守與故營地軾築雪堂以居自號東坡居士與潘大臨陳慥王文甫游時策杖往來江上泛舟赤壁遊西山寒谿後先題咏甚富將買田沙湖老焉尋以量移汝州去累官至兵部尙書後謫海南放歸至常州卒後贈崇政殿大學士加贈太師諡文忠

張耒字文潛淮陰人弱冠第進士累官起居舍人紹聖初知潤州坐黨籍謫監黃州酒稅徙復州徽宗立起通判

黃州後知穎州復坐黨落職初在穎聞蘇軾訃爲舉哀行服言者論其罪貶房州別駕安置於黃凡三至黃五年得自便居陳州未有雄才論文以理爲主士人競學者衆分日載酒殺飲食之晚益貧郡守欲爲買公田謝不敢乃監南嶽廟主管崇福宮卒建炎初贈集英殿修撰著有柯山集一百卷

陳過庭字賓王山陰人宣和間爲御史中丞時方臘陷諸州過庭上言致寇者蔡京養寇者王黼又言朱勔父子本刑餘小人竊取名器罪惡盈積宜昭正典刑以謝天下三人憾之陷以罪謫海州團練副使黃州安置

黃岡縣志

卷之十一

流寓

三

陳慥字季常蜀人扶風守希亮之子少豪俠晚隱居黃岡號龍邱居士又號方山子嗜讀書以溪山自娛蘇子瞻謫黃往來唱和爲作方山子傳子瞻去黃送者皆止磁湖惟慥至九江後講學於雪堂孫去非以詩爲高宗所賞官至執政

程顥字伯淳弟頤字正叔皆洛人也實生於黃按宋史及朱子二程夫子祠記顥之高祖羽會祖希振祖通皆葬河南天聖中通子珦初仕爲黃陂尉秩滿不能去遂家於黃顥以明道元年壬申生明年癸酉頤生後十數年當慶曆丙戌丁亥之間珦攝貳南安南安司理乃道州

周敦頤也。珣令二子師事之。顥學以正心誠意爲宗旨。力闢二氏。登進士。後調上元簿。遷晉城令。旋改監察御史。裏行時。王安石用事。顥一語不及功利。特遷太常丞。元豐初。以李定論罷歸。頤性嚴毅。由踐履中。入年十四。五便欲學聖人。元豐間。屢薦不起。元祐初。以呂公著薦。授西京國子教授。尋爲崇政殿說書。旋與蘇軾議論不合。軾黨。胡宗愈顧臨。又極論之。去官。削籍。徽宗初。徙峽州。復官。受一月俸。後奪於崇寧。復同。以嘉定十三年。賜諡顥曰純公。頤曰正公。淳祐元年。顥封爲河南伯。頤封伊陽伯。皆從祀孔子廟庭。黃陂舊屬黃州。於雍正七年。

黃岡縣志

卷之十一

流寓

三九

改隸漢陽。至今士大夫皆謂二程生於黃云。

元

龍仁夫元史劉詵傳廬陵人。同郡龍仁夫字觀復。文學與詵齊名。而仁夫尤奇逸流麗。所著周易多發前儒所未發。用薦署爲江淞儒學副提舉。不就。明志至正間徙黃州。明五經爲時矜式。學者稱麟洲先生。

蔣彥忠南昌人。勸課蘄黃。元末兵起。隱居黃岡。庶安鄉講學。授徒因家焉。

明

劉簡字孔章。號東園。江西臨川人。明初守黃州。有惠政。士



民德之成祖靖難兵起遂稱疾棄官寓居赤墜下旋徙居東菴鄉服官凡十餘載清介自持惟留書數篋而已後裔家於黃人稱所居爲留書灣

陳世昌江西舉人官武昌同知有治聲民愛戀之遂家於黃岡廷瓚仕愨卽其子孫也

周浩字季深四川人正統間官黃州同知視民如子遷石阡知府致仕附籍黃岡孫瓚舉人爲偃師令

程豪字子德蘇州人習儒術商於邑歲饑有積粟豪糜所積以給饑人邑令旌之兄表字子儀亦有文行督學高世泰爲立兩儒賈傳

黃岡縣志

卷之十一

流寓

四

國朝

補帽匠無家室居止擔頭有補帽具書數卷琴一襖被一小鑊一往來團風間以所得市米取小鑊飯之或煎茶爲飲暇則隨其所至澄潭激澗斷岸層巒長松之下或讀書或彈琴歌咏或坐卧數日不去問其姓曰何問其名曰白雲後卒於蘄州

李之華岳州人順治初游黃爲農家傭繫耒於頸曳而耕農家惡其無能數叱之旣而曰吾不能制牛也嚮者嘗教人矣或試以文輒就聞者稍稍訝之然無深信者陶一佐鄉之耆老也與之道語延歸使其子克壯正發克

家受學焉其後皆以文行顯之華無子既沒一佐爲營  
葬設主世世祀之信其學也

梅士棟字敬亭宣城人僑於黃性清潔不屑豪華每至村  
南無絃誦聲卽迂途避之曰俗塵汙入也能詩善書尤  
精繪事晚寓上巴河南梨花院名士多與之游得其筆  
意者唯訓導馬正塾

冷絃玉號芝巖山東膠州進士官安陸同知緣事罷職主  
講河東書院凡十餘年後進多所成就

國初郡城科名鼎盛中忽歇自絃玉至後科第稍稍復舊雖  
時會適然而經絃玉指授者不少選刻課藝不脛而走

黃岡縣志

卷之十一

流寓

四

四方後數年有張錦珩亦主講河東書院爲文專尙清  
醇一洗浮囂之習士林謂之珩璜比玉云錦珩字餘淳  
黃安人己未進士官南安知府

